

Inatsisartut ataatsimiittarfianni ataatsimiinnerit, siumut aalajangersarneqareersumik annertussusilimmik, radiukkut aallakaatinneqartarnissaannik KNR-ip pisussaaffilerneqarnissaanik sulissuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Siulittaasoqarfimmut ilaasortat)

Pillugu

Ilinniartitaanermut, Kultureqarnermut, Ilisimatusarnermut Ilageeqarnermullu
Ataatsimiititaliap

ISUMALIUTISSIISSUTAA

Siunnersuutip aappassaneerneqarnerani saqqummiunneqartoq

Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Mimi Karlsen, Inuit Ataqtigiit, Siulittaasoq

Inatsisartunut ilaasortaq Vivian Motzfeldt, Siumut, Siulittaasup tullia

Inatsisartunut ilaasortaq Laura Tàunâjik, Siumut

Inatsisartunut ilaasortaq Peter Olsen, Inuit Ataqtigiit

Inatsisartunut ilaasortaq Henrik Fleischer, Partii Naleraq

UPA 2017-mi ulloq 26. april 2017 siunnersuutip oqallisigineqareernerata kingorna siunnersuut ataatsimiititaliamit misissorneqarpoq.

1. Siunnersuutip imarisaa siunertaalu

Siunnersuuteqartut siunnersuut manna aqqutigalugu kissaatigaat Inatsisartut inersuarmi ataatsimiinnerisa nuna tamakkerlugu aallakaatinneqartarnissaannut periarfissiinissaq. Kalaallit Nunaata Radiuata (KNR), kisiartaalluni nuna tamakkerlugu aallataatitsisartuusup ataatsimiinnernik taaneqartunik piffissami aalajangersimasumi, taamaattoq itinerusumik nassuiarneqarsimanngitsumi, aallakaatitsissusaatitaalernissaa siunnersuutikkut siunertarineqarpoq.

2. Siunnersuutip inatsisartuni siullermeerneqarnera

Siunnersuutikkut anguniarneqartoq tunngaviatigut tamanit isumaqatigineqarpoq - tassa nuna tamakkerlugu raadiokkut aallakaatitsinikkut inatsisartut ataatsimiinnerisa nunatsinni inuiaqatigiinni amerlanerpaanik tusarnaarneqarsinnaanissaanut periarfissap isumannaarneqarnissaanut. Taamaattorli siunnersuut maannakkutut isikkoqartilluni tamakkiisumik tapersorsorneqarsinnaanngilaq, ilaatigut KNR-ip aallakaatitsisarnerata aamma KNR-ip aallakaatitsisarnermut tunngatillugu nammineerluni ingerlatsisinnaanermut kiffaangissuseqarnerata naalakkersuinikkut akuliuffigineqartussaanginneranik isummat assigiinngineri pissutaallutik. Atassut nutaarsiassaqartitsivimmut aalajangersimasunut pisussaaffiliinermut taarsiunneqarsinnaasoq pillugu allannguutissatut siunnersuuteqarpoq. Siunnersuut kultureqarnermut, Ilinniartitaanermut, Ilisimatusarnermut ilageeqarnermullu ataatsimiititaliamut ingerlatinneqarpoq, ilaatigut siunertaralugu inatsisartut ataatsimiinnerisa nuna tamakkerlugu aallakaatinneqartarnissaasa allatut iliorluni qulakkeerneqarsinnaanera eqqartorneqarneaqqullugu.

3. Oqaloqatigiiffiusumik ataatsimiinneq

Ulloq 8. maj 2017 Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisup aamma KNR siulersuisuunerisa oqaloqatigiiffiusumik ataatsimeeqatiginissaannut qaaqussisummik ataatsimiititaliaq tigusaqarpoq. Qaaqussisut isumaliutissiisummut uunga ilanngussa q 3-tut ilanngunneqarpoq. Ataatsimiinneq ingerlanneqarpoq 11. maj 2017.

Ataatsimiinnermi KNR-imit erseqqissarneqarpoq, Inatsisartut ataatsimiinnerisa aallakaatinneqarnissaat akerlerineqanngitsoq. Taamaattorli KNR-imit kaammattuutigineqarpoq, FM-ikkut aallakaatitsisummik allamik pilersitsinermi periarfissat killeqartut kisimik isigineqannginnissaannik, ammali siunissami periarfissat assersuutigalugu DAB- radio isigineqarnissaat kaammattuutigalugu.

Taamaattorli Isumaliutissiisummi uani ataatsimiititaliamit maluginiarneqarpoq taasissutissami uani oqaatsimik 'radio'-mik atuinerup FM-imik imaluunniit AM-imik killilersuinertut isigineqanngitsoq. Taamaattumik ataatsimiititaliamit siunissamut qulakkeerininnerusoq tikilluaqquneqarpoq siunnersuullu una akuerineqassagalarpat tatigilluinnarlugu Naalakkersuisut sulinerminni tamakku ilanngutissagaat.

4. Ataatsimiititaliap siunnersuummik suliaqarnera

Tamat oqartussaaqataanerata peqqissup ilisarnaatigai ammasuuneq, paasissutissiisarneq peqataatitsinerlu. Tamannarpiarlu tunngavigalugu siunnersuut una ataatsimiititaliamit

tapersersugassaqqitsinneqarpoq. Ilinniartitaanermut, kultureqarnermut, Iisimatusarnermut Ilageeqarnermullu Ataatsimiititaliamit inuiaqatigiinni kinguaariit tulliuuttut tamat oqartussaaqataanerannut peqataatinneqarnissaat pillugu unammilligassat ilisimaneqarput – qinersisartutut imaluunniit kinguaariinni tulliuuttuni naalackersuinermik sulialittut. Tamatumuuna maannakkut politikkerit uagut akisussaaffeqarpugut, ilaatigut politikimik suliaqarnerup qanilaartunngortinneqarnissaanut, tigussaasunngortinneqarnissaanut aamma paasinartunngortinneqarnissaanut. Inuiaqatigiit tamat oqartussaaqataanerini pingaarutilinnut peqataaqqullugit pinngitsaalineqarsinnaanngillat, matumani taasisarnermut, ulluinnarni aalajangersakkanut, ulluinnarni tunngaviusut pillugit oqallinnermut, kiisalu qinikkatta suliaat pillugit tamat oqallinnerannut. Taamaattorli inuiaqatigiit peqataanissamut kiisalu paasissutissamik sapinngisamik amerlanerpaanik pissarsinissaanut periarfissaqartinneqarnissaat sapinngisamik qulakkeerniartussaavarput.

Ilaatigut naalackersuinerup aamma naalackersuinermik ingerlatsinerup tigussaasunngortinneratigut ersarissunngortinneratigullu taamaaliorpugut. Tassani inatsisiliortutta oqallinnerannut – siumut iluarsaasseqqaarfiunngitsumik - malinnaasinnaaneq qitiutilluinnarpoq.

4.1 Siorngatigut aamma maannakkut aallakaatitsisarnerit

Kalaallit Nunaani siorngatigut piffissami sivisuumi inatsisartut ataatsimiinnerisa aallakaatinneqartarnerinik ileqqoqarsimavugut - naak amerlanertigut kalaallisuinnaq ingerlanneqartaraluartoq. Ullumikkut aallakaatitsineq KNR-ip TV-kanaliatigut KNR2-kkut ingerlanneqartarpoq, tassani isiginnaartut qinersinnaallugu oqaatsit suut tusarnaassanerlugit – kisiannili inatsisartut ataatsimiinneri tusarnaassagaanni ulluunerani fjernsynilimmiittariaqarlutik. Ataatsimiinnerit taakku tunngaviusumik suliffiup nalaani ingerlanneqartarput. Tamatuma saniatigut inuttaasut nittartakkakkut www.inatsisartut.gl. atorlugu malinnaasinnaanerinik inatsisartut nammineq neqerooruteqarput. Aamma aallakaatitsineq taanna Kalaallisut aamma danskisut ingerlanneqarpoq kiisalu ingerlaannartumik kingusinnerusukkullu malinnaaffigineqarsinnaalluni. Taamaattorli inatsisartut ataatsimiinneri ingerlaannartumik malinnaaffigissagaanni pisariaqarpoq internetsikkut annertuumik atuisinnaasumik attaveqarnissaq kiisalu nalinginnaasumik suliffiup nalaani nittartakkamut attaveqarsinnaaneq. Inatsisartut ataatsimiinnerisa siumut iluarsaateriigaanngitsumik malinnaaffigineqarnissaanut periarfissaq kingulleq tassaavoq inatsisartut ataatsimiittarfiani nammineerluni najuunneq - periarfissaq Nuummi najugaqarnermik aammalu tikeraartuunermik piumasaaqatitalik – taamaallaallu ullukut suliffeqanngikkaanni imaluunniit allanik suliassaqanngikkaanni atornerqarsinnaavoq. Taamaallilluni siunnersuummut nassuiaatini kiisalu Naalackersuisut akissuteqaataanni oqaatigineqartutut inatsisartut ataatsimiinnerisa siumut iluarsaateqqaarneqanngitsumik malinnaaffigineqarsinnaaneri arlalitsigut killeqarnerat ersarippoq.

4.2 Siunnersuutip kingunerititassai

Naalackersuisunit akissuteqaat, siunnersuutip siullermeerneqarnera kiisalu siunnersuut pillugu inuiaqatigiinni oqallinnerit tunngavigalugit ataatsimiititaliamit paasineqarpoq siunnersuut maannakkut akuerineqassagaluarpat atuutsinneqassanerannut periarfissat pillugit paasinninnerit assigiinngitsorujussuusut.

Atuutsitsilernissamut periarfissat

Siunnersuummi anguniarneqartup ersarissumik aalajangiunneqarsimanera ataatsimiititaliamit paasineqarpoq – kissaatigineqarpoq Inatsisartut ataatsimiinnerisa radiukkut aallakaatinneqartarnissaat, aallakaatitsinerup KNR-imit ingerlanneqartarnissaa kissaatigineqarpoq suliallu qulakkeerneqarnissaanut suliassartaa Naalackersuisunut peqqussutigineqassalluni. Siunnersuutip anguniakkap kissaatigineqartup anguneqarnissaa pillugu, killilersuiniarneranik peqquserpalaarneranillu paasinnineq siunnersuutip siullermeerlugu oqallisigineqarnerani sakkortuumik oqallinnermut pissutaasorinarpoq. Taamatut paasinnineq ataatsimiititaliamit isumaqatigineqanngilaq. Siunnersuummik taamaallaat kissaatigineqarpoq inatsisartut ataatsimiinnerisa siumut aalajangeriigaanngitsumik annertussusilimmit radiukkut aallakaatinneqartarnissaat kiisalu aallakaatitsineq KNR-imit ingerlanneqartassasoq. Taamaalilluni siunnersuummik akuersissutiginnineq taamaallaat Naalackersuisunut suliakkiissutip siunertaanik aalajangersaavoq. Taamaattorli siunnersuuteqartut siunissami nuna tamakkerlugu aallakaatitsisarnissamut periarfissat assigiinngitsut nassuiaatigisimavai. Periarfissat taakku siunnersuutip tunngavilersuutaaniippot taamaattorli piumasaqaatitut oqaatigineqaratik. Siunnersuuteqartut siunnersuummi kissaatit taaneqartut pillugit iluarsiiissutissanik arlalinnik ilusilersuiniarsarisimanerat ataatsimiititaliamit pitsaasutit isigineqarpoq. Taamaalillutik iluarsiiissutissanik siunertamut naapertuuttunik oqallinnissaannut inatsisartut periarfissinneqarput.

Ataatsimiititaliap paasinninnera tunngavigalugu siunnersuut aamma siunnersuummut tunngavilersuutit malillugit siunnersuutip ilusimisut isikkullip akuersissutigineqarnerata makkua **nassatarissanngilai**:

1. Inatsisartunit Naalackersuisunut suliakkiissutaannut atatillugu aalajangersimasumik suleriuseqarnissamik piumasaqarsinnaaneq
2. Sullissinissamut isumaqatigiissutip maannakkut attuuttup allanngortinneqarnissaanut piumasaqaat ass. Ilassutitut isumaqatigissummik suliaraqarnikkut.
3. Toqqaannartumik radiukkut aallakaatitsinissamut piumasaqaat
4. Kipitinneqanngitsumik radiukkut aallakaatitsisarnissamik piumasaqaat
5. Inatsisartut ataatsimiittarfiani inatsisartut ataatsimiinnerisa tamakkiisumik radiukkut aallakaatinneqartarnissaanik piumasaqaat

6. Nuna tamakkerlugu atorneqartoq FM-ikkut aallakaatitsisut maannakut atuuttoq inatsisartut ataatsimiinnerinik aallakaatitsinermut atorneqarnissaanik piumasaqaat
7. Nuna tamakkerlugu FM-ikkut aallakaatitsissummik allamik pilersitsinermut aningaasalersuinissamullu piumasaqaat
8. Inatsisip maannakut atuuttup allangortinneqarnissaanut piumasaqaat, tassami Naalackersuisut aamma KNR-ip sullissinissamut isumaqatigiissutaanni piumasaqaatit minnerpaaffissaannut taamaallaat aalajangersagaqarmat.

Akuleruffiginnittussaanningineq aamma tusagassiornermi kiffaangissuseqarneq.

Siunnersuutip matuma inatsisartuni eqqartorneqarnerani tusagassiornermi kiffaangissuseqarnerup killilersorneqarnera aamma akuleruffiginnittussaanningineq qitiulluinnarsimapput. Apeqqutit tassaasimapput siunnersuutip akuersissutigineqarneratigut tusagassiornermi kiffaangissuseqarnermik killilersuilersuisoqarsinnaanersoq, KNR-ip akuleruffigineqartussaanninginnerata allangortinneqarsinnaanera kiisalu akuleruffiginnittussaanninginnerup allangortinneqarsinnaanera. Tamatumunnga atatillugu ataatsimiititaliamut pingaartuuvoq erseqqissassallugu siunnersuutip matuma taasissutissartaa imatut allassimasoq:

*”Inatsisartut ataatsimiittarfianni ataatsimiinnerit, siumut
aalajangersarneqareersumik annertussusilimmik, radiukkut
aallakaatinneqartarnissaannik KNR-ip pisussaaffilerneqarnissaanik
sulissuteqaqqullugit Naalackersuisut peqquneqarnissaannik Inatsisartut
aalajangiiffigisassaattut siunnersuut.”*

(Ataatsimiititaliap erseqqissaanera)

Qulaani erseqqissarneqartumik oqaasertalersuineri inatsisartut isumaqatigiinniarninik nalinginnaasumik paasinninneruvoq, Naalackersuisut KNR-ip pisussaaffilerneqarneranik isumannaarinissamik pisussaaffilerneqassangitsut. Naalackersuisut taamaallaat pisussaaffik taanna pillugu sulissuteqaqqullugit pisussaaffilerneqassapput. Siunnersuummik ilusimisut isikkulimmik akuersissutiginninnerup **taamaallaat makkua nassatarissavai**:

1. Naalackersuisut politikkikkut pisussaataaffimmik sapinngisaq naapertorlugu naammassineqarnissaanik Naalackersuisunut piumasaqarneq- pineqartumi inatsisartut ataatsimiittarfianni inatsisartut ataatsimiinnerisa radiukkut aallakaatinneqartarnissaasa qulakkeerneqarnissaannik. Tamannalu iluatsissappat:
 - a. Radiukkut aallakaatitsineq KNR-imit isumagineqarnissaanik piumasaqarneq.

Akuleruffiginnittussaanginnerup Inatsisartunit allanngortinneqarnissaa pillugu apeqqummut maluginiarneqassaaq maannakkut aalajangersarneqarsimasut malillugit KNR-ip atuunnerani nammineq aalajangiisinnaatitaaneq inatsisunik aalajangersarneqarsimammat – inatsikkut inatsisartunit akuerineqarsimasukkut. Pisumi aalajangersimasumi uani sullissinnermut isumaqatigiissut Naalackersuisut KNR-illu akornanni isumaqatigiissutigineqartarpoq – uanilu ataatsimiititaliamut pingaaruteqarpoq erseqqissassallugu illuatungeriit marluk akornanni isumaqatigiinnerummat. Tassani eqqartorneqanngilaq toqqaannartumik pinngitsaaliineq.

4.3 Allannguutissatut siunnersuut

Naalackersuisut allannguutissatut siunnersuummik periarfissaqarneranik oqaaseqarnerannut ataatsimiititaliaq paatsungassuteqarpoq. Taamaalillutik Naalackersuisut akissuteqaamminni ersarissumik kissaatigaat aaqqiissutaasinnaasunik arlalinnik periarfissiisumik allannguutissatut siunnersuuteqartoqarnissaa - kisiannili allannguutissatut siunnersuummik saqqummiussaqsaratik. Tamatumunnga atatillugu ataatsimiititaliamit Naalackersuisunut eqqaasitsigineqassaaq, inatsisartut siunnersuutaannik suliaqannginnermi imaluunniit suliaqarnerup nalaani, Naalackersuisut tamanna pissusissamisoorsorigunikku imaluunniit kissaatiginartikkunikku, allannguutissatut siunnersuuteqarsinnaammata. Taamaattumik eqqumiiginarsinnaavoq siunnersuutip ilusimisut ilusillip tapersorsorneqannginnera pissutigalugu allannguutissatut siunnersuummik allagaqarnissamut pissutissaqsarorimanginnerat.

Siullermeerlugu suliarineqarneranut atatillugu Atassut siunnersuummut matumunnga allannguutissatut siunnersuummik saqqummiussaqsarpoq. Allannguutissatut siunnersuut imatut oqaasertalerneqarsimavoq:

“Naalackersuisut suliaqartinneqarneqarlutik peqquneqarnissaannut pissutissaqsarpoq tassuunakkut nuna tamakkerlugu radiukanalimik ammaassillutik aallakaatitsisalnissaannut, taannalu atorneqassaaq toqqaannartumik Inatsisartut ataatsimiittarfianiit radiukkut aallakaatitsinissamut, tamassumallu allaffissornikkut aqunneqarnissaanut nutaarsiassaqsartitsivik ammasumik suliariumannittussarsiuinikkut qularnaarneqassaaq.”

Ataatsimiititaliamit, Atassutip allannguutissatut siunnersuutaa periarfissat arlallit ilaattut isigineqarpoq, Atassutikkutullu KNR avaqqullugu, sullissisut allat peqataatinneqarsinnaanerak takorloorsinnaallugu. Taamaalillugu Inatsisartut ataatsimiittarfiani ataatsimiinnerit nuna tamakkerlugu radiukkut aallakaatinneqartarnissaata isumannaarneqarnissaanut KNR kisimi periarfissaanngitsutut ataatsimiititaliamit isigineqarpoq.

Atuutsitsilernissamat periarfissat pillugit, tak. imm. 4.2, aallakaatitsinerit annertussusaat, taamaattorli periarfissaq taanna ataatsimiititaliap attatiinnarumavaa. Taamaattorli pisumik tusagassiorfiit tusagassiorsinnaanermut kiffaanngissusaannik killiliinissamik inatsisiliortut kissaateqarnerat pillugu apeqqusiisumik pilersitsinissani ataatsimiititaliap kissaatiginngilaa. Tamanna qanorluunniit inatsisitigut paasinnittoqaraluarpat nalilersuisoqaraluarppalluunniit.

Aalajangiiffigisassatut siunnersuutip qulaani pineqartup suliarineqarnera kiisalu allannguutissatut siunnersuut saqqummiunneqareersoq tunngavigalugit ataatsimiititaliamit kissaatigineqarpoq allannguutissatut siunnersuummik nutaamik ima saqqummiussinissaq:

”Inatsisartut ataatsimiittarfianni ataatsimiinnerit, siumut aalajangersarneqareersumik annertussusilimmik nuna tamakkerlugu radiukkt aallakaatinneqartarnissaannik qulakkeerinninnissamat suliaqaqqullugit Naalakkersuisut peqquneqarnissannik Inatsisartut aalajangiiffigisassaattut siunnersuut.”

Ataatsimiititaliap allannguutissatut siunnersuutaa tunngavigalugu, Naalakkersuisut tunniussimallutik inatsisartut inersuarmi ataatsimiinnerisa aallakaatinneqartarnissaasa qulakkeerneqarnissaannik taamaallaat suliaqaassapput. Annertussusaa, piumasaqaatit, ingerlatsineq, suleqataasut il.il sapinngisaq naapertorlugu Naalakkersuisut nalilersortassavaat, tamanna tusarnaartut inatsisartut inersuami ataatsimiinnerinik siumut iluarsaateriigaanngitumik tusarnaarsinnaarnissaannik qulakkeerinninnissamat peqataasut avataaneersut soqutiginninnerat aallaavigalugu.

5. Siunnersuummut aningaasatigut kingunissaritinneqartut

Inatsisartut suleriaasaanni § 33 imm. 1-imi takuneqarsinnaavoq, aalajangiussassatut siunnersuutip allaffissornermi aningaasatigullu kingunerisassai siunnersuutip tunngavilersuutaani allassimassasut.

Taamaattorli siunnersuummi ersippoq, aningaasatigut allaffissornikkullu kingunerisassani apeqqutaassasoq siunnersuutip qanoq atuutilersinneqarnissaa. FM-kanalimik ataatsimik marlunnilluunniit pilersitsinermi aningaasartuutissat siunnersuuteqartunit naatsorsorneqarsimapput kanalimut ataatsimut 8 mio. kr. kiisalu kanalimut marlunnut 15 mio. kr. missaannut. Ukiumut ingerlatsinermut aningaasartuutissat 800.000 kr. aamma 1,5 mio. kr. annertussuseqartussat naatsorsorneqarlutik. Oqaloqatigiiffiusumik ataatsimiinnermi immikkoortoq 3-mi pineqartoq KNR-imit ilisimatitsissutigineqarpoq kisitsisit kingullit takutikkaat FM-ikkut aallakaatitsivimmik nutaamik ataaseq pilersitsineq 18 mio. kr.-nik akeqassasoq. Siunnersuummi uani saqqummiunneqartunut tunngatillugu akit assigiinnginnerujussuat ataatsimiititaliamit eqqumiigineqarput, taamaattorli tusaatissatut tigullugu. Taamaammat siunnersuut una Inatsisartunit akuerineqassagaluarpat

Naalakkersuisut siunnersuummik suliaqarminnut atatillugu sapinngisamik pitsaasumik aaqqiissuteqarnissaq nalilersorluassagaat ataatsimiititaliamit kaammattuutigineqassaaq, matumani atuisut kissaataat kiisalu aningaasatigut killissaritinneqartut periarfissallu ilanngullugit.

KNR-imut sullissinermut isumaqatigiissut aqquqigalugu KNR-imi aallakaatitsiviup ilaa atorneqalissappat, tamanna Namminersorlutik Oqartussanut allaffissornikkut aningaasartuutaassariaqassanngilaq. Inatsisigut suliniuteqarnermi aaqqiiniartoqassappat ukiumut AC-mut akissarsiaritinneqartut pingasorarterutaasa qaangerneqannginnissaat naatsorsuutigineqarpoq.

Ataatsimiititaliap allannguutissatut siunnersuutaanut tunngatillugu, aaqqiissutissatut tooqqarneqartumut aningaasatigut allaffissornikkullu kingunissaritinneqartut apeqqutaassasut ataatsimiititaliamit nalilerneqarpoq. Ataatsimiititaliap allannguutissatut siunnersuutaa akuerineqassagaluarpalluunniit siunnersuutaaqqaartup iluarsissutaasinnaasutut siunnersuutaasut atuutissapput. Taamaattorli ataatsimiititaliamit allannguutissatut siunnersuut ammasumik suliariumannittussarsiuussinissamik kinguneqarsinnaavoq, tamanna aamma Atassummit allannguutissatut siunnersuummit kissaatigineqarpoq. Tamatumunnga allaffissornikkut kingunissaritinneqartut 400.000 kr. qaangissanngikkaat naatsorsuutigineqarpoq.

6. Ataatsimiititaliap inassuteqaatai

Ataatsimiititaliap isumaqatigiittup allannguutissatut siunnersuut imaattoq saqqummiuppaa:

"Inatsisartut ataatsimiittarfianni ataatsimiinnerit, siumut aalajangersarneqareersumik annertussusilimmik nuna tammakkerlugu radiukkut aallakaatinneqartarnissaannik qulakkeerinninnissamut suliaqaqqullugit Naalakkersuisut peqquneqarnissannik Inatsisartut aalajangiiffigisassaattut siunnersuut."

Ataatsimiititaliap **allannguutissatut siunnersuutaa akuersissutigineqassasoq** ataatsimiititaliap **isumaqatigiittup** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaanniingassanngortippaa.

Mimi Karlsen
Siulittaasoq

Vivian Motzfeldt
Siulittaasup tullia

Laura Tàunâjik

Peter Olsen

Henrik Fleischer